

四庫全書

集部

欽定四庫全書

湖山集卷八

宋 吳芾 撰

七言律詩

志道相見和前韻

每憶湖山動老懷
今朝始作故鄉回
正慚行李忽忽去
忽報輶車得得來
幸對清談揮玉麈
肯辭痛飲倒金杯
我歸已遂終焉計
何日重逢笑口開

李子儀喜津改秩作詩相慶因次韻

懶復從人問里評縱今得譽亦虛聲有兒第使傳儒業
改秩何期冒寵榮敢望芝蘭如謝氏但親松菊學淵明
煩君慰藉來佳句讀罷欣然酒一傾

有屋依山復面湖幽棲試問有誰如門前更種千竿竹
堂上還堆萬卷書每恨暮年方卜築豈知今日得安居
鯉庭況有新桃李莫惜時來長者車

歸來到紅梅下有感

惜花端擬醉花時不謂花開失素期去日橫枝纔蓓蕾

歸來滿樹已離披，雖知勝賞輸同舍。
尚愛餘芳繞曲池，花亦念予情不淺。
更留殘萼索題詩。

二月望日三七姪移庖於休休堂約四老人為
送春之集拙者預一老之數因成八句

光陰過眼似奔輪，誰保生前夢幻身。
四老共成三百歲，一時已勝萬千人。
得閒對酒須拚醉，乘健看花莫厭頻。
勿謂病多衰已甚，尚堪開口送殘春。

偶苦耳聾

哀年已是病雙瞳那更新添兩耳聾山外鐘聲元不到
窻前雞唱亦難通便遭謗罵安能累縱有笙歌也是空
每恨肚皮從舊窄而今却做得家翁

巢內鷺園中鹿俱生子喜而有作

倦似淵明懶似嵇歸來聊向此中棲湖山圍繞吾廬靜
草樹高低野望迷鷺葦新巢方乳子鹿遊故苑又生麕
眼前景物俱堪賦落日何妨一杖藜

有感

自度吾生不久長老懷猶自愛風光
春來扶杖觀花急
夏到穿林看筍忙無限故人成鬼錄
幾多逐客寓他鄉
我今幸得身無事剩向湖邊醉幾場

和江朝宗韻奉寄

休言簿領尚沉迷器業如公豈久稽
不見自憐心若失
相從還記手同携飛黃正欲馳長坂
倦翼方欣返故棲
出處不同空悵望何時來過武陵溪

陳天予喜拙者得謝作詩相慶次韻以報來辱

一自同簪紱
冠幾經離合
幾悲歡荷君終始於人厚
知我疎慵涉世難
聞道休官能自適
惠然貽問更相寬
交遊耐久如君少
松柏方能保歲寒

再用前韻奉寄

向來雖著侍臣冠
憂國曾無一日歡
正色立朝從古少
犯顏論事似君難
思賢會見重相得
樂聖何妨且自寬
回首高風誰復繼
凜然名節照人寒

趙默卿用拙者所和樂天七句詩賦二篇見寄

因狀山中之景復成一首以報之

買山將近一由旬若比淵明未是貧萬疊峰巒俱入眼
四時景物總宜人花開自足供心賞酒熟何妨與客親
何日杖藜能過我竹林深處共藏身

龔帥以久別寄詩遠惠因次其韻

性便野服厭朝裾一意歸休學二疏門外渾無俗士駕
案頭惟有道家書勝遊但欲尋蓬島

湖中近築一亭
目為小瀛洲舊

事那能記石渠亦擬冥搜酬絕唱慚將瓦礫報瓊琚

天與疎慵一味閒
許辭畫戟老柴關
幾年欲作冥鴻舉
今日方隨倦鳥還
有水不妨時載月
無人誰與共登山
相望千里空相憶
樽酒何時一破顏

再和龔帥所寄

契濶經年阻曳裾
滿簪華髮愈蕭疎
五禽聊作林間戲
雙鯉忽傳江上書
詩句方慚成間斷
交情豈謂益勤渠
開緘更誦驚人語
恍若相從聽珮琚

聞道公庭白晝閒
更無夜犬吠江關
一時戾氣俱銷盡

千載淳風頓使還但恐賜環來北闕不容拄笏看西山
祇今汲直如公少正賴忠言一犯顏

和朱文卿落解後書懷

先生英氣欲橫秋唾手功名豈待求共指層霄看展翼
誰知平地亦沉舟簣中宰相寧嫌辱胯下將軍未足羞
有志會須騰踏去莫將富貴羨王侯

清明登白紵山

偷得鈴齋半日間喜逢佳節漫追攀扶衰強策青藜杖

尋勝聊登白紵山，遠岫千重雲出沒。
清溪一帶水回環，我來恨未窮游覽。
回首孤城落照間。

謝子肅任崑山丞，和余留題舊游詩。
復次韻謝之。

故鄉春好阻同游，誰與花前倒玉舟。
陳跡未能忘茂苑，新詩俄喜寄丹丘。
開緘已慰三年別，展誦還消萬斛愁。
文行如君今日少，藍田寧許久淹留。

臨湖閣為向巨源郎中題

宵襟灑落一塵無晚歲歸來足自娛去國何須懷北地
卜居且喜面東湖夕陽影裏山相映古木陰中鳥自呼
正好凭欄吟復醉胡為止酒太拘拘

拙者得歸子儀喜而作詩見寄因次韻

奉祠命下大明宮盡室歡呼笑語同但欲從容全晚節
敢言高尚激貪風醉鄉有約誰陪我詩社無人賴有公
從此故山添勝事未饒弘景相山中

和道叟韻

自憐涉世太迂疎豈料今朝得自如老去不知官况好
歸來頓覺道心舒湖山深處非凡景松竹陰中有舊廬
靜坐忽聞烏鵲喜開門還得故人書

澤民因誦樂天欲留年少待富貴富貴不來年
少去之句慨然有感遂廣此意作詩相示余以
謂人之會遇各自有時年少固不可留而時亦
何可待樂天自不應出此語而澤民亦不應為
此詩因反其意以和之

老去疎慵厭仕途歸來林下學真如不思身外千般事
只占人間一味愚但得清尊長對客縱添白髮亦從渠
世間達宦多憂畏曾次還能似我無

勸君且醉甕頭春休把升沉累此身自古功名須遇主
到頭富貴不由人蟠習器業元高世落筆詞章更出塵
道在何憂年少去九重前席會相親

和李光祖

英才端合在星躔不謂淹回閱歲年却向山中親白石

更來澗下濯清泉高情雖似秋雲淡麗句還如蜀錦鮮
怪得了無塵俗氣家風元是謫來仙

老去深悲寵辱驚歸來曾次渺寰瀛登山臨水隨宜坐
問柳尋花信意行境勝已勾詩興動身閒還引道心生
親知滿眼如君少何不時來共一觥

男子升沉自有時莫輕感慨嘆稽遲古來常患才難得
道在寧憂世不知會際亨嘉膺晝接且將粗糲療朝飢
他年富貴君何慮造物於人豈有私

和田伯清見寄

可嘆人生有限身終朝長是困囂塵向來每愧為人役
今日方能保我真幸有一丘堪避俗何妨百歲作閒人
更煩妙句相褒借頓覺柴門暖似春

落筆擒辭爛有章故應往歲擅文場身登霄漢聲猷著
興寄湖山氣味長無計盍簪同把酒尚懷掃地對焚香
依然日暮碧雲合相望回頭各一方

和楊季恪景疏希白二首

二疏高躅聳簪紳寂寞無人繼後塵
一代風流雖已遠
千年名德鎮如新
幸拋印綬歸空谷
得與湖山作好春
若較前賢那可並
却慚溫詔下嚴宸

人譏居士老來迂
與世依違總不符
雖似子牟懷魏闕
却同居易學浮屠
鋤荒只欲開三徑
適意寧論泛五湖
習次更無塵一點
且同高士詬虛無

和胡宗澤見寄

湖邊策杖步新晴
陡覺宵襟萬慮平
老去不須防意馬

靜中已是息心兵
閒來綠樹陰中坐
懶去紅塵鬧裏行
賴與故人供一醉
不辜今夜月華明

故人皮裏貯陽秋
愛我身如不繫舟
羞向人間為諂首
喜來林下作遨頭
雖無仙骨能騎鶴
尚有閒心可狎鷗
乘興惠然時過我
一尊相對笑言稠

和李光祖二首

漏殘休更問銅壺
自視平生分已踰
每嘆奔馳非得計
只知靜退是良圖
耽詩况味今雖在
愛酒情懷近已無

詔比二疏吾豈敢或言出處亦相符

天資灑落更瑰奇何患諸公不已知運蹇尚須資汲引
時來寧復藉維持家聲況是釣公裔文采還高幼婦碑
大器成時須在晚如君方壯未為遲

和孟世功二首

老大疎慵一腐儒長年離索與誰俱杜門有意修黃老
開卷無心誦典謨不是穿林尋鶴鹿即來臨水伴龜魚
故人今日如君少乘興還能過我無

不見風標六歲餘
閒中應是樂琴書
逢辰自合應殊選
遜世何妨且隱居
已愛新詩如沈謝
更聽高論似嚴徐
時來會有騰驤日
未許傍人笑問疎

和若夫韻二首

此身雖縛此心飛
脫得東還似解圍
鹿鶴向人如贊善
林泉見我欲生輝
食珍他日終難飽
飲水從今亦可肥
况與親朋時一醉
益知真樂是來歸

老夫吟詠本非長
僻性年來忽異常
唯是平生愛風月

致令清夜夢池塘正慚遣興非工部却喜言詩有卜商
佳句偶從閒裏得片心如到白雲鄉

和魯憲見寄二首

厭直承明老從臣不將人事撓天真幾年欲作山中相
今日得為林下人竹裏醉吟聊遣興水邊宴坐足怡神
回思當日遊從地過眼渾如陌上塵

向來三老楚江濱一笑相歡氣味真君向越溪持使節
我歸台嶺作閒人頗思花下酒無算尚記詩成筆有神

何日輶車能過我開懷一洗渴心塵

和葉先生韻

三分春色一分強風雨憂愁莫見妨何幸山城官事少
且看溪路野花香絲絲嫩綠垂流水片片飛紅逐去檣
一日要須拚一醉百年能醉幾千場

杯酒忘懷不計巡少年行樂肯輸人年來性復便疎懶
老去誰能浪苦辛春暖園林花放早月長庭院鶯來頻
物華正爾撩詩思况得詩翁好句新

和董伯玉韻

野性耽閒晝掩扉坐看斜日上書帷不妨挾冊從吾好
亦學吹竽笑昨癡鬢髮星星行且老胷襟碌碌苦亡奇
與君正欲論心事又恐分攜各一涯

和人見寄

高義如君舉世無賢關十載會琴書匆匆邊馬來時別
鬱鬱亂山深處居天外風塵仍斷絕人間豪傑正蕭疎
何時尊酒論文去千里相思寄望舒

和金克孝韻

天公放我作閒人寵辱無緣到我身
濁酒興來寧惜醉小園日涉不嫌頻
祇知丘壑追元亮敢望京師說子真
漸近青春尤可樂有花如錦草如茵

和韓子雲見寄二首

投紱歸來意適然從今免詠式微篇
但令晚歲胷中適安用虛名身後傳
顧我只宜乘載月如君端合上凌煙
功成或欲尋真去莫惜馭風來揖仙

世態無常似暮霞人生難久類春花已堪入谷攜樵斧
還好臨湖把釣車對酒未能忘酒伴哦詩尤更憶詩家
何由會面論心曲兩地相望天一涯

和陳澤民見寄

長年擾擾走紅塵今日方還自在身行處湖光侵杖屨
坐來山色照衣巾敢希寄傲陶元亮且學躬耕鄭子真
猶恐風煙勞顧揖未能終日作閒人

應喜哀翁得掛冠裁成妙語鼎來頌清如水上看修竹

秀似雲中見遠山已播政聲來闕下更傳詩句滿人間
祇疑自此飛騰去未許歸來伴我閒

和朱世同韻

聊向空山避世喧數椽茆屋鎖苔錢怕逢俗客慵開戶
欣慕前賢願執鞭已見二毛真老矣幸存三徑盍終焉
細思萬計唯閒好敢為浮名誤百年

幽棲終日斷經過坐閱殘編眼欲花道在固應甘淡薄
心閒尤覺厭紛華正慚我老無佳思頗羨君詩似作家

拙惡豈能賡妙句臨風吟詠祇咨嗟

道義誰人似乃翁有兒如子豈憂窮自應便享千鍾養
不謂今猶四壁空好遣江山歸筆下莫將荊棘置胷中
詩書儻不辭勤苦衣繡何難繼祖風

和葉先生見寄

春到山城花木深興來誰與共登臨空驚節物催人老
強對芳菲索酒斟已喜筠筒先見寄更聞藜杖欲相尋
勸君未用忙歸去要向尊前話寸心

和范希孟韻

急隱歸來趣轉深
靜中不放一塵侵
日長宴坐風敲竹
夜久澄心月滿林
詩句每從佳境得
酒杯長為故人斟
時危莫用計然策
身在五湖空鑄金

和范遷善見寄

溪山深處養清高
名位雖窮節行饒
舉世何人堪寂寞
杜門終日自逍遙
交情已作千金重
別恨空驚一葉飄
莫向五湖成獨往
他年相與到雲霄

和金克孝韻

長嗟軒冕累吾身幸得歸來見此君
晚出漁樵呼作伴行隨鹿鶴與同羣
浮光喜踏山前月弄影貪看水底雲
還有江梅通信息一枝暗裏遞清芬

和世同見懷

君去經春未得還老夫幽恨滿春山
海棠花過乖同賞楊柳陰成阻共攀
對月有誰陪笑傲臨流惟影伴清閒
何時策杖來過我把酒論文一解顏

立春

老夫近日苦多屯且喜來朝已立春但得餘殃隨臘去
敢圖好事逐年新湖山入眼風光好親舊論心氣味真
更若此身無疾疚快哉天地一閒人

和王瞻叔泉字韻

暮年亦復侍甘泉每對青銅只自憐寧忍憂疑探虎穴
且將得失付魚筌歸來但欲無身累老去那能徇世緣
若得優游全晚節從人喚作地行仙

和陳天予見寄真字韻

前賢惟有太丘真豈謂於今見後身雖是一時為逐客
不妨千古作全人自從別後心如渴却喜詩來句絕塵
無計復陪花下醉對花只覺倍傷春

和鮑昌朝湖上二首

青山疊疊起汀沙幽鳥驚人噪古槎竹葉受風縱甲刃
松膏流地蟄龜蛇愛閒正喜逢僧話乘興何妨到酒家
飲罷相攜磨石壁淋漓醉墨半欹斜

一片湖光淨見沙晚來閒上釣鯽槎山橫平野堆寒玉
水繞孤城綰卧蛇遙認茶煙知禁苑忽聞機杼得人家
夕陽歸路西風急笑倩傍人整帽斜

湖上遣興

閒來湖上覓清涼竹杖芒鞋野興長青嶂回環如洞府
綠波澄澈似滄浪枝頭落絮隨風急水面浮魚逐餌忙
自笑衰翁無箇事悠然身世兩相忘

大雨後湖上有感

擬為紅蕖棹綠波那知一夜作霹靂風狂俄失雲中樹
雨漲全無水面荷尋壑勝遊先自減泛湖樂事又多磨
老懷自度無閒處且向尊前強笑歌

九日和向巨源送行韻

世事無窮生有涯羞將白髮對黃花一江秋水涵初鴈
萬里暮天飛落霞昔日自憐長作客今朝方喜得還家
尊前話別寧辭醉後夜相思月滿沙

和逐年九日陽字韻

天上恩來解郡章
人間那復是重陽
老身已許歸三徑
佳節何妨醉百觴
但有笑容生面目
更無閒事撓心腸
旁人不信吾歸去
今日真成返故鄉

余有重陽詩歲和一篇今日偶和成二首

此會從來有故常
湖山歲歲做重陽
黃花已是鋪三徑
綠酒何妨舉百觴
小圃晚來堪散步
薄田秋入足充腸
登臨莫起淒涼嘆
且喜成歸老故鄉

去歲重陽解郡章
歸來又復見重陽
此身已作林泉客

今日更持萸菊觴正要登高窮遠目不妨拚醉浣愁腸
佳辰若得長無事何必乘雲至帝鄉

重陽即席呈諸兄叔

浙浙西風作晚涼驚人節物又重陽頻年此會成千里
環坐如今共一觴且把黃花開笑口莫因白髮攪愁腸
人生聚散渾無定來歲那知在故鄉

重陽再和乙丑歲韻

老去逢秋倍感傷此生能見幾重陽喜君綠蟻初浮甕

容我黃花滿泛觴幸返丘園如素志况陪親舊話中腸
已拚今日如泥醉苦恨頻年客異鄉

和吳致政韻

晚學知誰繼後塵鄉閭舊仰老成人門無車馬何妨靜
室有詩書不厭貧閨裏抽身甘寂寞閒中覓句鬪清新
杖藜莫惜頻過我共醉床頭滿榼春

和沈先覺韻

枉度浮生八十春休談天數與人倫長貧已是難餬口

久病那堪更累身獨把新詩娛晚景誰將靈劑起痿人
若教得酒時時醉醉裏高吟尚絕塵

和朱世同韻二首

立朝初不愧廷臣晚節胡為苦乞身自度濟時無遠畧
不如辭祿作閒人林間幸已安禪榻湖上何妨擲釣綸
若也故人能過我尚堪共醉甕頭春

已歸林下得從容還喜時和與歲豐好景盡歸詩句裏
閒愁俱付酒杯中臘殘惟願呈三白春去從教落萬紅

親舊自今休問位只須喚我作吳公

和朱世同見寄

門外青山玉作堆山前一水更縈迴
來雖喜風煙好老去還驚歲月催
不見故人增寂寞尚懷往日共徘徊
何時軒蓋重相過伴我花前醉百杯

到雙勝忽忽不及款舟中成小詩寄良器兼簡
楊宰

海濱何處足春風盡在王孫小圃中
雨洗山光供几席

日移花影上簾櫳
扁舟回首煙波隔
尊酒何時笑語同
若對揚雄賞幽勝
杯行應亦話哀翁

寄江朝宗

君來已是後花期
不見春風爛熳時
檻外止餘新芍藥
簷前祇有舊酴醾
尚堪共泛忘憂酒
亦可同吟遣興詩
倒指春歸能幾日
速來相就賞殘枝

寄周子及

回頭一別兩經秋
喜奉安輿反故丘
自謂此時須見過

誰知官事不容留君遊幕府聲猷著我住湖山景趣幽
出處雖殊心不異迂程能為一來不

寄江朝宗

碧雲暮合首重回正擬前村共探梅耐久直須看歲晚
追歡何必待春來山中縱有詩千首花下誰同酒一杯
顧我與君非面友願言命駕莫徘徊

寄陳能之

烏府延登謬諤臣共知吾道一時伸方陳讜論來裨國

還守清規去潔身義豈能忘去佞憑熊聊復試臨民
頗思一見論心曲同醉梅花爛漫春

寄陳叔進

鄉里衣冠久不振後來猶喜有斯人曾為蓬島神仙主
端是儲闈羽翼臣大節已觀能直己小淹何惜且臨民
君家幸有佳山水莫向他鄉別卜隣

寄楊次雲岸長老

高僧良士總貪閒雖我同庚不住還詩罷誰知勤治圃

齋餘無事只潛山亦聞相約來傾蓋久待如何未扣關
湖上藕花今正發不妨共戲水雲間

寄趙德莊

故人分袂幾何年不謂乘輶到海邊我守丘園甘已矣
君馳原隰尚依然有懷風月空相憶無計杯觴可共傳
出處不齊徒悵望夕陽衰草自連天

又陳伯明知郡遠寄詩篇因次韻二首

信筆題詩不記篇聊憑賦詠寫林泉閒來倚杖雲千嶂

睡起凭欄月一川
野性已安三徑裏
吟魂猶繞兩湖邊
何時更許陪清話
復把深杯手自傳

喜到舊家山水鄉
依然山色與湖光
此身宛在真仙窟
回首空懷太守章
豈意新詩猶見及
尚言故郡不相忘
自憐批政無遺愛
安得人思蔽芾棠

寄陳彥邦二首

自古中興用實才
正資賢哲共圖回
若為清禁挽不住
亦效衰翁歸去來
幸有江水供笑傲
更邀風月與徘徊

得閒莫惜頻相過伴我尊前笑口開

不須細細說行藏四十年來夢一場我得放歸心已足
君能勇退道尤光閒中倍覺林泉好閑裏誰知日月長
我已與君成二老更將一節起吾鄉

和采石詩韻寄韓無咎

野性從來愛水雲合耕巖下釣溪濱宦游愧負平生志
臨按欣逢我輩人奎閣雄文光照日錦囊麗句豔爭春
外臺況上三年計一節行看詔墨新

寄劉汝一陳天予

昔年言路記同遊回首那知歲月流已嘆數公隨物化
却欣二老與余留去天不謂踰三歲補外那知尚一州
想得賜環俱在即不應似我老林丘

二公見和又成一首寄之

憶昔同臺接勝遊相期端不愧清流一時人物存無幾
百歲光陰挽不留老去只思陶靖節向來尤嘆薛居州
亦聞聚首時傾倒應笑衰翁守故丘

和陳澤民即事二首

鷄聲催曉夢驚殘喜得歸來卧碧巖
已是人間三月暮
尚餘枕上五更寒
心安靖退雖無事
身覺衰顏亦鮮歡
賴有故人時會面
開顏一笑酒杯乾

蕭條古寺野僧殘
聊與僧俱住翠巖
樹影繞簾春晝靜
水晶搖屋暮天寒
固知書劍不嫌冷
却恨杯盤未盡歡
當念老人衰已久
外雖強健實中乾

和遠老韻

野性平時酷愛山年來何幸得休官情知軒冕生無益
身在林泉死亦安已免出門頻應接尚貪散策縱遊觀
得師妙語相開發始覺浮華不足看

和遠老見懷

老去光陰能幾何祇求適意不求多消除舊恨憑三盞
斷送餘生付一蓑風月情懷雖已減漁樵伴侶尚相過
師來好趁荷花盛我欲同遊繫棹歌

和朱守有待亭

使君歛惠撫吾鄉物阜年豐特異常已向湖中同衆樂
更來山上發天藏登臨緬想高懷適賦詠懸知雅興長
獨恨杜門方屏縮莫窺佳致望餘光

和魯季欽別後寄

盍簪經歲遽分襟夜夜相思夢裏尋寄遠正慙無好語
開緘忽喜得高吟感君不替綢繆意使我還銷鄙吝心
他日相逢重把酒莫辭蘸甲十分深

病起泛舟呈請親友

屏跡山間歲月深
四圍綠樹總成陰
已欣叢竹生湖岸
更愛雙蓮出水心
倚杖頓驚明老眼
艤舟還喜豁煩襟
病餘雖是無佳思
乘興何妨試一吟

山居歸來恰一年有感

去歲茲辰始息肩
俄然日月已周天
經營小隱雖云畢
栽種清陰苦未圓
湖畔百年多古木
山前一望足平川
從嗟白髮催吾老
能享林泉得幾年

再和四首

花枝拂眼柳垂肩幸得身閒且樂天
木杪夕陽當反照
草頭朝露豈長圓興來策杖雲迷徑
睡起凭欄月滿川
老矣不堪供世用只將蕭散度殘年

歸來深欲斷塵緣常拜青詞密籲天
既幸此身無玷辱
更欣盡室得團圓
捫心只合安三徑
度力那能障百川
若也天公終見念從今便是再生年

卜得幽居野性便
山中風月水中天
新栽翠竹陰雖薄
舊植青松蓋已圓
高致固難追綠野
勝遊那復繼斜川

我今已得安心法早掛衣冠不待年

新買湖頭十畝園綠陰罇裏見青天金櫻相亞枝枝裊
銀杏低垂顆顆圓仰看烏鳶翔古木俯窺鷗鷺戲晴川
便須臨水營臺榭要與漁樵樂暮年

澤民見示遊洞宮護聖二詩次來韻

洞府藏真鎖碧巖我來頓覺百憂寬真人已去留遺像
古木猶存翳舊壇清入杖藜襟抱豁冷侵衣袂骨毛寒
何方便作誅茆計幸我年來已掛冠

山間安有此池塘疑是天分一派江萬仞方如青玉案
千章森似碧油幢簷前山色日侵座屋角松聲夜撼窓
遊罷擁衾渾不寐心清都把睡魔降

和薛丞

歸來林下恰年餘喜對青山更面湖野興自來知不淺
宦情今日覺全無任從俗目嗤吾老未許山靈誚客逋
多謝新詩相慰藉頭風一讀頓然蘇

再和

少年勤苦惜三餘老去惟思泛五湖已向林間甘淡泊
更從塵外學虛無酒徒漸覺隨年減詩債還應隔歲逋
強欲冥搜賡絕唱苦無筆力似三蘇

送朝京赴福清宰

來往看看二十春開懷情話日相親懸車我已安三徑
捧檄君俄向七閩肯為浮名隨薄俗但施善政撫疲民
他時奏最歸來處好訪湖山莫厭頻

生朝有感

每恨生朝天一涯今年却喜得還家漸省寒谷回春律
愈使衰翁感歲華客至寧辭傾竹葉老來能醉幾梅花
餘生祇願長如此浮利榮名未足誇

遣興

天憐衰病放還鄉猶恐多情易感傷已遣蛙聲喧鼓吹
更令燕語奏絲簧固知老去心情減頗愛閒中氣味長
終日杜門無一事不妨隱几淨焚香

余以庚寅十月十日抵敝廬今恰三年感而有

作偶成三律

溯自洪都返故園今朝倒指恰三年
舉頭但見松筠長轉盼那知歲月遷
幸有青山長在眼休嗟白髮已垂顛
此身儻未歸黃壤花下猶堪醉聖賢

何處風煙似我園且將蕭散樂餘年
向來已不憂三黜老去誰能羨九遷
門外往還惟白足里中遊舊盡華顛
竹林已是幽棲地只恐風流愧七賢

幸有湖邊數畝園尚堪行樂度殘年
驚魚自合潛淵去

倦翼寧思出谷遷既乏仙方能却老又無奇策可扶顛
但知藏拙安吾分一任人稱賢不賢

送沈子壽

孤城度日宛如年賴有吾人慰眼前把酒論文方累月
揚鞭別我遽朝天長才合赴風雲會新渥行沾雨露邊
帝里故人如見問為言衰悴愈瞤然

挽袁正言

言路同遊記昔年英風凜凜共推賢從容我豸霜臺上

感慨嬰鱗黼扆前持橐自應登禁闥乘輅聊復向江濡
一朝豈料成千古空有清規後代傳

挽鄭武子

中原耆舊久彫零賴有夫君尚典刑持節有心吞朔騎
請纓無路報朝廷壯圖落落嗟難合末俗紛紛笑獨醒
坐脫已超塵世去空餘遺像在丹青

挽李季文二首

世趨捷徑蹈危機公獨安恬度歲時但見謙謙卑自牧

不為赫赫急人知政成名已聞丹宸官滿身將上赤墀
豈料一朝成奄忽空傳南國去思碑

吳郡為僚記少時別來光景迅如飛江頭我始懷章去
嶺外君纔解組歸正望故人時見過迴思往事遽成非
死生契闊無窮恨極目高原淚滿衣

挽翟伯壽二首

高情爽氣薄雲天灑落真如晉七賢筆下蟲魚元自得
胷中丘壑更依然風流已足追千載壽考胡為不百年

人物此時誰得似，祇應餘慶尚流傳。

少日為僚古樂成，一時共喜得豪英。盍簪便有功名志，
傾蓋曾無世俗情。回想舊遊如昨夢，頓成塵跡負平生。
故人倒指彫零盡，矯首佳城淚欲傾。

挽徐子固

相逢一笑記臨安，倒指今逾二十年。別後每思論舊事，
朝來忽報啟新阡。蒞官凜凜風猶在，居里恂恂譽更傳。
遙想武陵溪上路，送車千兩一潸然。

挽李行可

當年闕下久棲遲故里歸來萬事非
訪舊幾人成鬼錄傷君未老棄親闈
開尊尚想延賓醉發廩猶思賑歲饑
積慶流芳知未艾會看門戶日光輝

挽五兄知府二首

平生臭味最相投方喜同時得退休
正欲從容陪杖屨從茲蕭散老林丘
高標豈料成千古遺愛空嗟滿一州
兄弟凋零無復繼故山誰與我同遊

三吳意氣各翩翩尚憶俱遊太學年伯氏久驚歸厚夜
吾兄遠復掩新阡自憐門戶今衰矣回想音容祇泫然
猶幸諸兒渾競爽他時當不負家傳

挽何內翰二首

場屋聲名四海知十年平步上丹墀伏蒲議論高千古
視草文章妙一時雅望自應登輔弼壯圖仍欲濟艱危
誰知竟負經綸志空使人懷殄瘁悲

老去交遊半淺深高山流水獨知音分攜苦未經寒暑

轉盼那知隔古今
聯事尚懷時把酒
同朝猶記共論心
無因執紼西山路
空對東風淚滿襟

挽錢省幹

高義由來擅月評
壯年銳志立功名
助平逆黨謀先定
慢罵兇酋色不驚
赤憤蹉跎憐晚景
青雲躡負平生
祇應餘慶鍾蘭玉
桂籍傳芳奕世榮

挽陳巡檢

夫君端是一時豪
排難捐軀不憚勞
忠義自能全里社

姓名那肯辱銓曹一生個儻心常逸五世團樂壽更高
瞑目定知無可憾九原風樹漫悲號

挽王之先

壯志凌雲氣吐虹才華高出輩流中讀書不負建樓意
好客尚賒投轄風鶚薦共期登虎榜鷗飛無復到蟾宮
春來池館渾如舊夢覺黃梁事已空

挽應偉節尊人

歸來閭里問高年此日惟公五福全三世儒科身及見

四經鄉飲衆推先安時不恨青衫晚適意還欣綵服鮮
終始哀榮無可憾想應含笑入黃泉

挽孟仲安二首

琴劍縱橫迹已陳凜然英氣尚如存向來忠義全鄉社
老去詩書付子孫正好林泉窮勝事那知風月負清尊
他年陰德留餘慶會見簪紳萃一門

義薄雲天氣吐虹平生心事許誰同從容破賊無遺策
清白傳家有祖風共意騫騰千里外誰知蕭瑟九原中

百年已矣餘芳在庭下行看發桂叢

挽程朝議二首


兵革連年苦亂離江東耆舊日衰微身兼五福如公少
眼見重孫自古希未厭案頭翻貝葉方榮堂上戲斑衣
東風忽破南柯夢回首音容涕淚揮

憶昔安輿到郡時使君歡近鎮江湄萬人踴躍瞻耆艾
千里歌謠美孝慈盛德所鍾門閤在平生無愧鬼神知
佳城一閉成千古徒有陰風拂總幃

挽席夫人二首

持身禮法動無違四德如君古亦稀
大國增封光典冊長年獻壽擁庭闈
俄驚萬里飛丹旆尚想萱堂玩綵衣
竊意生前猶有恨沙堤不及見公歸

猗歟陶母世稱賢生子還持輔佐權
政府舊曾迎象服成都重見擁戎旃
佳城閉處千車集華屋生來五福全
終始哀榮今已矣空餘陳迹載青編



欽定四庫全書

集部

湖山集卷十九

詳校官庶吉士

臣

柳邁祖

主事

臣

呂雲棟覆勘

謄錄監生

臣

俞錫玉

謄錄貢生

臣

黃琮

欽定四庫全書

湖山集卷九

宋 吳芾 撰

五言絕句

題商樂菴

遊戲一橋中自謂有足樂何如在商山笑傲視寥廓

芳洲

秋風彫蘭芷芳洲久寂寞痛飲讀離騷此興亦不惡

詠松

幸不生澗底傑出蒼蒼崖歲寒只孤秀萬木非吾儕

送白酒白蓮與鍾統制錢廣文因成二絕

甕頭白酒熟池上白蓮開我愛君純白聊持薦一盃
白酒方浮玉白蓮仍可人贈君飛大白聊作冷官春

六月末間拒霜已開

暑氣猶未退寒花早已開哀年寧有幾寒暑若相催

香叢

緩步繞芳叢時時鼻觀通不須薰百和滿院是香風

生朝有感

每歲逢生日予心喜復悲新年六十六能得幾多時

小有洞

世人競蝸角終日汨塵緣誰謂名園內深藏小洞天

虞兵張宥康永年未六十一日相繼力求歸農
余因嘉其志作小絕以紀之

仕宦老不休虞兵乃知止低頭媿斯人三嘆不能已

芙蓉

誰向澄波上盡將雲錦鋪無因一寓目却憶小西湖

前太守仲求石問留題因和三首

不解追時好尤非治郡才故山猿鶴怨應怪未歸來
度力難堪事甘心作棄才欲歸歸未得却悔出山來
此日老法從當年窮秀才從今歸去好非不遇時來

題日涉園

幽園足佳趣散策日經行歲久禽魚熟人來自不驚

題閱歲亭

歲月催人老少年安在哉
羨君杯酒裏日日見花開

題望雲亭

白雲來何時英英冠山椒
西風莫吹去使我心搖搖
蒙恩易鎮豫章丐假還鄉
途中偶成十七首

處處是紅蕖分明似畫圖
忽忽看不盡歸對小西湖
官舍似郵傳宦游如路岐
吾年行七十安用苦奔馳
觸目盡陂塘山光接水光
近來仍雨足莫道是山鄉
方困長涂滑俄逢赫日明
只憂開太早却恐雨還生

沙虛防敗岸舟小怯驚湍行路難如此爭如野處安
劇暑當三伏新涼似九秋日光還欲吐雲影未全收
中夜不能眠頗疑天有雨寒燠自古然不應冷如許
自江至吾廬七日喜及半却恐席未溫又過江南岸
村逕迷南北晨興乃錯行悟來還已遠却悔早貪程
崇閣瞰方池池邊綠樹圍披襟臨水坐寧復畏炎威
雨餘江色淨風過稻花香客裏逢清曠何妨且納涼
遊魚跳水面幽鳥嘯山腰各隨飛潛性人猶戀市朝

睡裡聞風雨吾行擬暫停起來搔首坐喜見一天星
蒼崖崛起聳飛瀑從天下一嶺跨兩州千年無九夏
茲嶺別二年今朝又重過過了還復來哀哉蟻旋磨
兩山夾蒼煙雙瀑掛峭壁洶湧非一朝傾瀉幾千尺
千尺石屏雄屏邊列數峰巍然不可犯真是鎮疆封

和任宰元紹見寄十首以歸來問信湖山撫摩
松菊為韻

出仕慚無補長年詠式微天公憐我意一旦許來歸

綠鬢久垂雪壯心今已灰翩然歸舊隱端似再生來
身既遠市朝足不到州郡但知食與眠此外不暇問
秋來宇宙清雨後山澤潤老農喜我歸時報豐年信
四圍山繞舍一帶水平湖遠近俱堪畫登臨自足娛
開門無一事終日飽看山石罅鳴流水翻驚響珮環
閒穿脩竹行時把孤松撫身世兩相忘恍如居洞府
人心生劒戟世路足風波祇有歸田好誰能自揣摩
為邑赤城下豈欲尋赤松我家幸不遠杖屨會相從

新詩遠寄將字字脫塵俗時節近重陽何由同把菊

六言絕句

春盡同諸公遊紫巖各賦六言

一徑草深迷路萬點花飛到天明日定知春去祇今便是殘年

和劉與仁見寄

雞黍經年契闊池臺落日登臨千里空勞回首一尊誰與論心

七言絕句

和左達功

英豪何事亦顛隳
命分多應與我齊
尚有他年功業在
未應歸去把鋤犁

和林大任三首

融融春色滿花源
楊柳陰中繫畫船
笑逐黿頭花下去
旌旗夾道鼓淵淵

蘭舟泛泛漾輕風
十里桃花一望中
疑是餘霞天外落

不應花解滿山紅

花遶禪房水更深靜中啼鳥有嘉音
我來已覺心如水
不用臨流更洗心

和隱老見懷二首

獨立溪頭悵望時
高人遺我送春詩
不知春色歸何處
月落空庭費夢思

咫尺經時阻笑言
春歸空想給孤園
一聲啼鳥山深處
宴坐蒲團未覺喧

和天子二首

自昔常難四者并一杯相屬意非輕祇今欲破愁城去
賴子時來舉酒兵

吾子才如千里駒肯同泛泛水中鳬乘時早取封侯印
莫憚郊原骨已枯

和金功叟二首

兩家誕日俱延客長恨無緣笑語同輒奉朋尊聊介壽
願言百歲亦如翁

君家今歲受恩封共慶夫夫婦婦同況遇誕彌尤可樂
願拚沉醉似仙翁

再和天予二首

行軒未用苦相催花下清尊正欲開君若此時留不住
何如當日罷休來

中秋花月共徘徊正喜相逢笑口開君既不留吾亦去
何時又向此間來

和梁次張謝得酒見寄四首

傳得仙家不老方釀成春色甕頭香一樽聊爾資杯酌
爭似相携入醉鄉

春入橫塘綠勝醅更將清淺照寒梅試吟秀句臨流坐
引得疎枝一晌開

妙齡才氣壓同升談笑端能却五兵況復錦囊新且麗
粲如春樹萬枝榮

平生性僻有詩耽每恨才慳不得兼獨嗜君詩無厭數
從教人笑我多饒

有感十首

當年舊跡已塵埃
曉日猶疑講殿開
涕淚不知黃屋處
傷心時有北人回

延福池臺荆棘深
上皇無復更登臨
寂寥崇觀當年事
愁絕關河萬里心

洛邑塵氛暗不開
百年宮殿總成灰
栢城晝日風蕭瑟
不見朝陵勅使來

塞曲咿鳴催斷腸
毬車輾輾載啼粧
漢家近屬三千客

性命如絲寄虎狼

草芥蕭然十閣珍車中粧具不時新留犁服匿誰供給
臺閣悠悠食肉人

蜀錦機中瑞鵲盤宮袍歲歲給千官朱門次第皆輕暖
御所空悲易水寒

雪壓穹廬風怒號紛然羊馬雜腥臊遙知玉座無餘地
嘆息功臣甲第高

河山關塞一萬里文武衣冠二百年四海蕭條宮殿去

無人解道取幽燕

漠漠黃雲塞草低
南人空說翠輿歸
孤臣淚盡仍嘗膽
白首江湖鴈北飛

宮院深深今是非
可無三戶報秦期
直應更作包胥泣
未抵含冤屈宋詞

寄韓子雲總領

與君有約看梅花
準擬尊前共笑歌
花已飄零君不至
夕陽芳草奈愁何

再和絕句寄韓子雲

開盡千花到藕花相將又聽採蓮歌無人共酌尊中醪
奈此花前風月何

寄韓子雲二首

去歲花時許我來花前竟阻共銜杯如今又是花開也
忍使衰翁獨看梅

點檢枝頭春已來不應辜負掌中杯與君索笑須宜早
莫待城頭吹落梅

得子雲和篇約元宵見訪再用前韻以速之二

首

聞道元宵始肯來見梅說與且停杯行將有客同清賞
雅致高標一似梅

花開本是待春來天遣春先薦我杯君莫疑花開太早
相思一夜發寒梅

相思一夜寒梅發忽到
牕前疑是君盧仝詩也

錢丈處和所寄韓子雲約賞梅絕句復用前

韻謝之三首

錦囊新句忽傳來字字清如竹葉杯要須莫放傳杯手
看即歸調傳說梅

麴生為我惠然來陡覺春浮湫濫杯飲罷冥搜無好語
但將風味屬江梅

竹符驅我出山來萬事無心付酒杯又見江城春到也
傷情却憶故園梅

寄朝宗二首

湖水春來拍岸平山光幻出小蓬瀛幽深未許凡人到

只待君來共落成

海棠已試十分粧
細看妖嬈更異常
不得與君同勝賞
空燒銀燭照花光

贈張發

日給都來能幾何
汝能受少却辭多
試詢世上無厭者
還有何人肯恁麼

代張發答

天作凶荒可奈何
飽人漸少餓人多
小人已免飢寒迫

縱得錢多待恁麼

括蒼陳與叟携所撰春秋義例見過書于卷後
獨抱麟經三十年發揮褒貶勒成編休嗟當世知音少
自有遺書後代傳

元夕即席呈郭次張

過了元宵到曉鐘
一年樂事又成空
杯行不用深辭醉
明日君西我亦東

七夕戲成二絕

時入三秋氣已清
節臨七夕露初零
如何老子臨風坐
也望天河牛女星

寄語天河牛女星
人人乞巧望聰明
老夫養拙生憎巧
只要冥心度此生

送酒與諸葛宰

由來康濟屬仁人
公更慈仁酷愛民
聞道憂勞添瘦悴
遣愁聊送甕頭春

送朝宗兼簡閩帥

年來知我不如公日日相思恨不逢君若見時須問我
為言老子已龍鍾

今日春色可佳乘興謁許倅因成小詩

春入風流別乘家滿園桃李挾春華殷勤為我傾醇酎
要看庭前百樹花

許倅索和篇復次前韻

十分春色在隣家我獨傷心感物華君若此時辭痛飲
也應辜負後園花

安仁絕覽亭

簷前列岫連雲聳亭下雙溪徹底清可但坐來無暑氣
老夫病眼頓增明

滕王閣

盡道滕王閣太早合新舊觀復雄規我來興葺非難事
却恐俱為識者嗤

題臞菴

輕視浮名若一毛名園百畝占江皋三賢祠宇誰重葺

何不添公作四高

遊仙都觀五首

來訪仙人古玉虛
山前有客指迷塗
煙雲渺渺孤峯絕
松竹森森一徑迂

策杖行行入翠微
步虛山下久忘歸
幽棲宜有中林士
何事斯人近世稀

聞道山顛有鼎湖
蓮花還似舊時無
軒轅去後空車轍
疑此山川即舊都

人已乘龍去不還尚餘雙鶴不知年坐來頓覺塵寰隔
始信壺中別有天

登攬茲山古到今流傳今有幾何人如君勝踐懸知少
況有新詩為寫真

題蛾眉亭用內翰沈公韻

幾多去掉與來帆競利奔名一水間應怪行人渾不悟
臨流長是蹙眉山

權郡許丈錢別於蛾眉亭悵然有作

此邦是處見蛾眉獨有斯亭見處奇對此已添離別恨
可堪更值夕陽時

醉中偶有所感再成一絕

倒著山公白接籬尚懷前日醉蛾眉江山風物還如舊

祇欠波間玉笛吹

去年會客斯亭酒半命漁人吹玉笛
江中月墮醉歸夢中縹緲猶有餘韻

緬懷舊游
故有是句

酒酣再賦一絕

二年兩度到蛾眉今日還來話別離所恨行人難久住

酒闌不見月明時

題枕流亭

山涵倒影新晴後
水漾圓花乍雨時
每到凭欄心似鏡
細看無一不相宜

題戴雄飛腴軒詩

四壁蕭然萬卷書
時人莫認作癯儒
他年得志英華發
始信胸中味道腴

過姑蘇

游宦重來二十年江山風物總依然道傍民吏猶相記
獨怪吾衰雪滿顛

新創太平樓未及落成而去漫留一絕

登臨祇待此樓成要與邦人樂太平甫及樓成余已去
忽忽一眺但覓情

早行五首

畏暑凌晨更疾驅疎星影裏度籃輿忽驚道上人如堵
知是田家出趁墟

此地惟多古樹林路傍處處足清陰行人九夏熱如火
到此清風忽滿襟

長涂終日困炎蒸破曉扶衰強趁程好是籃輿橋上過
一鉤斜月水中明

跋涉州涂僅八旬今朝纔得次安仁更須五日為行客
方得開藩見吏民

我無政術強為官所至將迎每厚顏何事深村赤脚婦
亦聞鉦鼓出籬間

睡仙樓

此壚當日飲神仙
醉倒和衣壁上眠
酒醒興闌人不見
但留佳話古今傳

題惠照齋宮僧房

古木修篁翠欲堆
小窻那更面山開
誰知局促塵埃裏
猶有山光入眼來

題許倅浮香亭二絕

一新欄檻水中央
更植疎梅向水傍
只恐花繁亭太小

黃昏無處著清香

為愛梅花不自禁
擬令風月到花陰
水深草滿都迷路
祇向暗浮香處尋

言老自雲堂携十六大士畫像見過與世間傳
寫者不同驚喜贊嘆因成二偈

禪月定中觀妙相
神奇古怪乃如斯
起來援筆一揮掃
驚殺人間老畫師

水旱無憂不用祈
祇祈心事莫相違
我今衰老渾如許

惟仗神通放取歸

題鍾路分見一軒二首

名利場中車馬塵區區有愧百年身如君未老甘閒退
眼底今方見一人

懶將功業勤燕然閉戶深居二十年嗟尚強顏紆郡紱
老來猶未得歸田

夜與作霖避暑南園登江月臺二首

坐遍遐觀渌照亭涼颼了不到簷楹更登江月還蒸鬱

誰道人間夜氣清

俯瞰江流萬尺臺
暑天長引好風來
若為今夕如相避
懷抱何由一快哉

捉月臺

謫仙捉月古今傳
我訪遺蹤似未然
山下濁流長混混
夜深安得水中天

月巖

半輪斜月掛巖邊
見者多應嘆未圓
圓極會如鉤樣曲

何如此月鎮嬋娟

遊月巖

仙人蜕骨幾何年
姓氏于今祕不傳
石壁蒼崖無處問
空餘洞府尚依然

平生性僻喜巖居
事不如人只守株
擬欲結茅依石罅
仙人還許我來無

月沼

大道從來惡滿盈
脫身便欲老巖扃
杜門漸解埋光意

積水姑為半月形

予赴官當塗絕江而西夜宿慈嚴秉燭游三洞
時主僧出示諸公留題因用樂天韻成一絕

洞中風水鑱松筠一見都忘老病身
安得結茅長此住
臨風臨水作閒人

再和

諸公得得走車輪要向忙中樂此身
我昔不來今日到
始知枉作把麾人

昔白公蘇公祖公在郡之日皆領客
游是剝留詩而去余甲申之冬雖自

天官出守是郡竟無
此暇日故有感而賦

夏日遊靈隱東園贈東方道人

松竹回環十里陰一聲啼鳥覺山深道人睡足北窻下
一榻清風直萬金

十五夜南園納涼

兀坐鈴齋困鬱蒸舉頭忽見月華明興來策杖園中去
聊復尋山聽水聲

初至豫章二首

邦人喜見我之官
豐足駢肩隴畝間
莫道使君來已暮
使君知是愛求閒

邦人知我入城闈
夾道焚香喜色新
愧我倦游灰百念
顧將何以慰斯人

過許氏居

小崖水畔得幽居
一見令人憶故廬
幸有山園并水遶
天胡不放我歸歟

陪梁大諫陳察院同登蔣山

盡室齋心謁梵宮願求一語卜窮通老夫祇欲歸田去
懶把前程問志公

懋慈雲寺

幽人不見許玄度千載徒存舊梵宮水竹回環猶可愛
徘徊山下想遺風

登進賢縣治後山望雲亭

古木千章翠欲交白雲疑只在松梢公餘莫惜頻登眺
無限風煙滿四郊

登望雲亭

記得來時上比亭亭荒有景亦徒清
如今亭與景俱勝
水倍秀兮山倍明

倚樓

獨倚危樓一望長惱人情處是斜陽
神州更在斜陽外
縱使無情也斷腸

東樓落成二絕

荒郡城樓久已傾
我來聊復為經營
南樓已是增雄觀

今日東樓又落成

人道樓前礙甕城無多山色到簷楹那知皂蓋行春日
却與春風最有情

北樓二首

不分羣兒敢跳梁向來走馬飲長江茲樓不是為觀美
要向樓前受敵降

折衝自古在精神從事兵車亦苦辛羽扇綸巾前日事
尚能談笑靜風塵

題總持寺龍井

洞庭歸去幾何年
早歲猶來澤我田
我訪遺蹤雖已泯
靈泉百尺尚依然

過金陵

當時護蹕此盤旋
倒拍重來僅十年
決策遷都言漫切
自憐微力莫回天

題金山四首

江上經行四十秋
今朝始得駐扁舟
老夫寧復重來日

欲去殷勤更少留

老大疎慵百不堪
倦遊猶未脫征衫
君王若許投簪去
擬與頭陀共此巖

北望瓜洲咫尺間
向來白骨積如山
欲論舊事慵開口
且對高僧共說閒

人言海上有三山
弱水瀰茫去路難
若欲目前尋髮髯
只須來此凭欄干

寄題隱靜三首

五峯雙澗舊標名我恨當年去不成却羨箇中人自在
飽看山色聽泉聲

向來連歲守江城到處題詩滿戶庭獨欠茲山一轉語
倩師與我謝山靈

我師一出幾何年聞欲東歸未有緣何日扶藜能過我
湖山深處共談禪

玉山道中

路遶孤村一徑微上連碧嶂下清溪水光山色渾如畫

引得行人憶故樓

西安道中二首

平林環翠如山立
野水涵空似鏡開
道上人家多美竹
欲行未去更徘徊

水浸野苗森碧玉
風翻早稻卧黃雲
有年如許誠希見
農父猶言未十分

洪崖

張老升僊不記年
石崖遺跡尚流傳
心期默契真如見

何必追隨與拍肩

過嘉禾呈方懋德

昔嘗此地奉周旋倒指于今三十年今日相逢成二老
那知又復到尊前

和許守松棚

插天修幹已鱗皴誰挽青枝架水濱却退炎威涼滿座
都緣清蔭布如雲

真止堂

我有虛堂號真止坐來萬慮清如水君今更以止名堂
想見了無塵念起

待雪呈子儀二首

曉見紛紛滿四山胡為未肯到人間化工若解呈新巧
連剪冰花破我顏

不須坐客苦言歸看取天花滿院飛已是雪床先到了
夜深應與月交輝

過上饒有感

少日隨親官此州如今老矣復來遊此身縱健那能久
何苦奔馳不自休

讀劉與權壯士歌

滿眼煙塵未息戈禦戎無策奈愁何一尊濁酒空庭晚
獨自歌君壯士歌

置酒與五客餞行因成一絕

送盡行人我獨留老夫無計解離憂勸君今夜休辭醉
明日江山總是愁

留長河堰

湖山堂下水聲寒夜半琮琤響珮環夢寐欲歸歸未得
却來此處聽潺潺

和龔漕二首

我老強來分外間君才端合在中臺語離正欲連宵醉
應笑清齋不舉杯

人生笑口苦難開故事當修戲馬臺已許為君拚一醉
何妨今日且銜杯

和劉與仁見寄

莫為窮愁賦七謔會須終日飲無何人間佳士由來少
世上浮名未足多

安仁挹僊亭

區區終日困塵勞長恨僊山去路遥
豈謂一朝供顧挹
坐令逸氣出層霄

戊子孟夏二十二日登碧雲亭有感二首

去年昨日我離家轉眼俄驚閱歲華
春草池塘長入夢

不堪兩度見荷花

來時荷蓋翠相扶，不謂經年尚守株。
縱使香風來不斷，爭如歸去小西湖。

五月七日晚登碧雲亭有感

連歲芙蓉照眼明，今年荷葉又青青。
老夫去此無他戀，祇憶看花水上亭。

又登碧雲亭感懷三十首

晚上危亭暑氣清，薰風微動入疎櫺。
重重草樹高低綠，

疊疊峰巒遠近青

晚上危亭眼暫明
風煙濃淡媚郊坰
箇中妙處吟難盡
分付人間作畫屏

晚上危亭喜作晴
亦思郊外一閒行
無端騎從相遮護
不放山翁適野情

晚上危亭瞰野塘
藕花無數散清香
若為荷葉分青綠
一半紅粧半淡粧

池中之蓮分兩色淺深各半故葉亦分青綠

晚上危亭看綠荷
風翻荷葉欲藏花
使君要見紅粧面

莫放碧雲重疊遮

晚上危亭逸興多却尋小艇下煙波酒狂聊作碧筩飲
折盡花間幾柄荷

晚上危亭側耳聽新蟬噪罷亂蛙鳴老來只是便幽靜
頗厭人間強聒聲

晚上危亭興未窮仰看星斗已懸空可憐熠燿飛撩亂
也欲爭光迥野中

晚上危亭一解顏公餘偷得半時間未能投綬尋歸路

聊復銜盃對好山

晚上危亭拍顧間
羊牛來下鳥飛還
細思物理須知止
何用區區祇強顏

晚上危亭顧四隅
小松環繞幾千株
他年黛色侵天去
應記栽時是老夫

晚上危亭望彼蒼
時時飛電迸流光
嗟人生世須臾裏
未必能如電久長

晚上危亭詠式微
封章再上未容歸
羨他白鷺凌風去

却向山前自在飛

晚上危亭望遠山望中有水亦回環終然不似吾廬好
上下山光水色間

晚上危亭覽物華斜陽影裏度歸鴉暮山隔斷鄉關路
矯首臨風眼欲花

晚上危亭遮鬱蒸風生兩腋覺身輕更籌只是催歸去
不到城頭月未生

晚上危亭待月生雲頭俄湧一輪明終朝汨沒塵埃裏

對此身心覺頓清

晚上危亭為少留
亭前暝色已供愁
更聽畫角聲悲壯
愈使愁人厭遠遊

晚上危亭力已疲
胡為歸計尚遲遲
如今若便休官去
也勝當初未有時

晚上危亭與客同
話頭只是說山中
老來百念消磨盡
只有歸心羨暮鴻

晚上危亭望大江
天教千古作金湯
中流擊楫人何在

徒感興亡對夕陽

晚上危亭景色饒
眼中突兀是凌歊
三千粉黛知何許
祇有江山鎖寂寥

晚上危亭一凭欄
青青最愛謝家山
謝公陳迹雖磨滅
餘韻遺風尚可攀

晚上危亭想謫仙
孤墳寂寂鎖寒煙
高風直節誰能繼
只有詩篇後代傳

晚上危亭望石城
楚君曾向北間興
城池蕪没人何在

只有空山幾箇僧

晚上危亭憶孟君
龍山一醉見天真
堪嗟東道空遺臭
爭似尊前落帽人

晚上危亭憶令威
凌虛山上悟玄機
丹成不見升騰迹
徒想當年化鶴飛

晚上危亭憶隱居
高情逸氣古人無
橫山祇有精廬在
無復書堂舊藥爐

晚上危亭懶舉頭
竹椽蘆屋亦堪羞
我將一變成雄觀

長與邦人作宴游

晚上危亭喜有秋
民安物阜本無憂
鈴齋坐嘯雖多暇
爭似歸田得自由

寄龔漕六首

自古知心不易逢
君心還與我心同
縱令自擇交成契
更有何人得似公

幾年湮塞豫章溝
歲歲民間有水憂
我意若非公善後
不應城裏解通舟

貢院門前並北湖有田百畝却荒蕪
愿君種取花千樹
付與邦人作畫圖

葺得南園過一春無從再見物華新
忽忽相別休相憶
已有風流賢主人

天朝未許投簪去我幸已成全璧歸
全璧歸來何所憾
暮年只是惜分違

聞公新有帥垣除一路逢人盡賀予
瓜代得賢人尚喜
予心歡喜更何如

垂虹聞笛

三十年前此凭欄醉聽漁笛暮江寒重來雖復聞三弄
老去終無舊日歡

和王知府惠瓦硯

文房四子舊周旋老去情疎祇自憐不謂陶泓猶見念
遠來相顧不相捐

得家書喜津病愈

老懷鬱鬱苦難舒忽報吾兒病已除便覺身心無箇事

萬錢不抵一封書

得鄉書

聞道交親知我還
歡迎競欲越鄉關
我於鄉里初無補
又復勞人祇汗顏

戊子春術者劉五星謂予壽有八十一感而有
作二首

縱使誠如日者言
此身只合在林泉
從今便得休官去
止有閒居十五年

多少同年盡溘然我今獨喜尚安全儻延朝夕誠為幸
敢謂猶能十五年

周相士謂予壽至九十三又成一絕

年登九九已云多相士猶添十載過萬事都捐無復念
老而不死待如何

覽洛中名園記有感

歷官冉冉踰三紀閱世看看近七旬更覽名園興廢記
愈令人憶故園春

欽定四庫全書

湖山集卷十

宋 吳芾 撰

七言絕句

領客賞梅

經年相別阻傳杯，忽見梅枝入眼來。
今夕勸君休惜醉，不應辜負臘前梅。

只擬花開把酒杯，南枝忽遞暗香來。
徑須領客同清賞，莫待城頭吹落梅。

移梅北隩和黄清表韻

自慚面目久塵埃擬對冰姿一笑開
聞道前村連夜發
豈辭健步遠移來

和董伯玉探梅

寄語南枝及早開莫遲春信待人催
我今已辦千鍾酒
準擬花前醉百回

梅莊主人袖詩見過累日欲得次韻以汨汨無
暇且和一絕

偶驅小隊踏蒼苔
無數梅花照眼開
更有高人同勝賞
此行端是不虛來

何彥清梅詩二絕用韻頗嚴諸公相率同和

清愁幽恨不禁春
寂寞池塘雪意昏
寄語高樓莫吹笛
夜寒留取伴龍孫

只把南枝作雪看
一般風韻照人寒
當年兒女還知此
定借君來答謝安

和十二弟梅花

春到衡門苦恨遲
遍尋竹外賞南枝
夜來已報春消息
試問主人知不知

和李民載梅花二首

褐衣懷玉未全貧
况有梅花作好春
麗句與花相映發
總輸天上謫仙人

獨坐無聊感歲華
騷人忽寄一枝花
雖無素手簪羅髻
已覺春生野老家

後圃初見梅花一萼二首

杖藜閒步小園來，喜見寒梅一萼開。
若無春意猶羞澀，應待詩翁著句催。

枝頭已是送春來，懷抱何妨試割開。
滿園若欲俱開遍，須倩杯觴日日催。

梅亭蓋舊太守徐公禔所作，傳者謂公得庾嶺
梅移種于此，故創斯亭。余來相距未六十年，曩
日之梅已無復有。感時追往，因取野梅環植之。

仍賦二絕

已無庾嶺舊時梅，但見梅亭向水開。
遐想風流猶髣髴，更將梅逵四簷栽。

種梅我始效徐公，已覺幽香鼻觀通。
寄語後人無剪伐，要令凋郡識春風。

坐間見裝成早梅數枝

正欲攀條折藥看，忽驚枝上雪斑斑。
不知妙手新裝綴，誤使衰翁爲解顏。

又和黃清表惠早梅

姑射風姿絕點埃年年長是臘前開方疑今歲無消息
多謝君能折取來

梅怨

幾年不見主人歸及見開時又別離若也有花無分賞
何如休種滿園池

我與梅花素有期故應花怨我輕離巡簷索笑寧無日
少待歸來酒作池

雪後觀梅

雨聲纔歇雪漫漫深恐梅花不耐寒
破曉踏泥來問訊
細看枝上喜平安

春色三分已一分江梅猶自占青春
有花堪折須拚醉
莫待東風吹作塵

折梅

不傍茅簷便竹籬初聞猶未許人知
一枝到手春雖淺
肯負花前金屈卮

寒梅

冰玉精神絕點埃人間無物似寒梅
凌霜傲雪渾閒事最是欺春不逐來

蠟梅二首

誰將栗玉刻蜂房巧向梢頭取次粧
羞得江梅都避舍滿園不見一枝芳

園林搖落獨芬芳未讓江梅雪裏香
還恐人嫌梅太白故來枝上盡塗黃

謝陳詹山惠蠟梅

歲晚相逢眼已明一枝還復見高情幽香不與江梅共
要與夫君鬪獨清

藏雲寺有海棠一樹在僧舍後竹籬荆棘之間
余因勸耕偶見之遣兵移植於堂下仍賦一絕
以紀之

海棠一樹竹籬根密掩深藏若避人移向亭前端有意
要令山下盡知春

詠海棠呈子肅

海棠元自有天香底事時人故謗傷不信請來花下坐
惱人鼻觀不尋常

子肅見示和篇復次韻

花到濃時自有香未逢真賞亦堪傷今朝溲鼻渾如許
豈是茲花返故常

和陳子良海棠四首

春來人物盡熙熙紅紫無情亦滿枝正引衰翁詩思動
舉頭那更得君詩

花間春色麗晴空惱我狂來只遶叢試問妖嬈誰與比
一株勝却萬株紅

雨後花頭頓覺肥細看還是舊風姿坐餘自有香芬馥
不許凡人取次知

十年栽種滿園花無似茲花艷麗多已是譜中推第一
不須還更問如何

領客賞海棠雪作

絕艷妖嬈壓衆芳況來燭下逞新粧引將姑射神人到

亦逐春風上下狂

撩撥遊人思不禁也緣尤物蕩人心今宵雪向花間作
應妬此花紅太深

去春勸耕雲際移植海棠曾留小詩今歲困于
多事欲往不果悵然有懷復和前韻以示主僧
去年勸相到雲根滿樹花光欲照人料得今年花更好
無端風雨阻行春

寄朝宗海棠

金史四庫全書
卷十
海棠已賦十分粧細看妖嬈更異常不得與君同勝賞
空燒銀燭照花光

和潘大卿芍藥二首

落盡羣花春已殘忽驚庭下錦新翻衣深領客窮清賞
一笑開懷倒數尊

拂拂輕黃染御衣出羣標韻異繁枝此身已分京華隔
不謂天香尚許披

邦人獻芍藥四種曰御愛紅曰霓裳紅曰綴珠

冠子曰紅都勝因同朝宗夜飲賞之遂成二絕
以記一時之勝

冠子綴珠初泣露霓裳舞袖更縈風就中縱有紅都勝
淡佇爭如御愛紅

芍藥移來傍玉欄淺深濃淡一般般夜深促席來相就
要把春容子細看

東湖觀荷有感

自有東湖知幾年荷花今日尚依然堪嗟世事時時改

祇有荷花歲歲妍

雙頭並蒂出天然呈瑞懸知好事連
果得故人來對飲何妨一笑到金蓮

再見雙頭蓮

我來纔見月初圓兩度池開並蒂蓮
嘉瑞還來非偶爾懸知連歲有豐年

謝王祕書送桂花

病中恨不見花開賴有仙郎折送來
一笑相看如有得

呼兒草草具樽罍

桃花菊

秋來不謂見春華
疑與春風是一家
已向枝頭開菊蕊
更來菊上作桃花

名園看盡好花枝
黃菊施朱獨未窺
應是天憐秋寂寞
故分春色到東籬

賞山茶

向晚佳人逞艷粧
偶隨月姊到山房
自憐老去無佳句

亦復冥搜爲發揚

和子儀送箭筍二首

與君林下久相從
蔬筍由來嗜好同
不餉腥羶惟餉此
想應知我舊家風

滿合圓如玉筍勻
一開喜氣頓生春
非君與我誰知味
俗客惟誇嗜八珍

和陳義卿秋香

小園無處著清香
誰剖枝頭栗玉黃
可恨楚人元未識

只知蘭芷是孤芳

和周明瞻秋香五首

落葉初辭萬木林
誰將翡翠屑寒金
朝來散入亭前樹
著處幽香欲滿襟

月窟仙人冷淡粧
鵝黃衫子翠羅裳
雖無妖艷誇塵俗
別是人家一種香

惱人風味冠江南
浪蘂浮花總覺凡
對此自宜文字飲
不須更倩玉纖摻

山腰水際有餘青造物多應特稟靈桃李無言甘避舍
可憐黃菊強儀刑

已愛清秋霽景鮮山明水秀竹娟娟更來花下成真賞
頻覺飄飄意欲仙

夜飲觀風堂龔漕折芙蓉侑酒

燈下看花已可人此花那更有精神不辭今日尊前醉
只恐紅粧不是真

再和

坐上花光欲照人，深疑花是洛中神。
已拚今日如泥醉，何必須分妄與真。

和王知府惠雙井茶

摘從雙井尚餘香，遠寄山翁見未嘗。
咀嚼新芽味新句，陡驚冰雪沃枯腸。

梅花下飲茶又成二絕

昨日花前酒太過，今朝怕見近流霞。
不應辜負花枝去，且嗅清香倍飲茶。

強拈茶碗對梅花應是花神笑我多更取香醪拚一醉
不禁風味惱人何

桂堂

長恨年年月窟秋無人共拍酒船浮君家雙桂開時節
我欲從君載酒遊

和戴解元雄飛瑞香二首

芳心似與春風約絕豔還宜曉日籠雖謝幽人持贈我
對花無奈憶山中

碧玉扶疎自可觀
花頭纏錦更團圓
坐來已覺明人眼
況有幽香馥鼻端

感花

春雨不止花已離
披終日感傷因成八首

正欲持盃賞萬紅
却遭連日雨兼風
種花欲看難如此
可是衰翁賦分窮

年來老病苦相侵
已是傷春不自禁
那更雨聲長在耳
連朝滴碎惜花心

雨脚才收擬杖藜
簷前依舊又垂垂
倘余有分花間醉
會有風和日暖時

縱令日日醉春風
已恨花無十日紅
何事東君長作惡
不容春色麗晴空

千花到底不如梅
勝賞猶宜踏雪來
今日滿天長是雨
如何花下得徘徊

春來日日欲尋春
樂此踈慵老大身
豈料青春今過半
蕭蕭風雨却愁人

嗟我明年是七旬此生能見幾番春
憑誰爲補青天漏放出春光處處新

一雨綿綿不暫停天公於此底無情
不應直待花飄盡始放陽和作好晴

飯客看鶴賞梅遇雨有作

鶴舞梅開總有情小園方喜得雙清
無端風雨妨遊覽不使衰翁眼暫明

魯漕惠鹿鶴花果

鏤果團繒宛似真尊前一見喜生春感公持此爲余壽
益悟浮生是幻身

和梅花前見鶴

雙鶴翩翩到我前與花鬪白更爭妍低頭自覺形儀穢
安得飄然跨上天

松嶺

君愛山間十八公儼然風操出樊籠四時已占青青色
更有松黃勝萬紅

三三徑

種成松竹與江梅杖履相過日幾回
莫謂箇中三友足也須更許老夫來

進賢道上老松奇古可喜去秋經從因命於空
處補種今漸有生意

來時惟愛古松青去日新松種已成
令尹若能終此意清風着處會知名

昔杯渡禪師自西域開山隱靜止携五葉松來

歲月既遠余求此山中之松已化爲烏有矣護
國遠老知余此意偏搜之天台中得於玉霄
峰下移以見餉遂爲林下之光因詩以謝之

杯渡移從西域來一枝五葉翠成堆謝師致此爲吾壽
使向湖山深處栽

詠松

古人長抱濟人心道上栽松直到今日若能增種植
會看百世長青陰

古邑荒涼但有松濃陰夾道勢騰空行人破暑忙歸去
未必茅簷有此風

濠水累年不泄魚既充牣每觸熱輒死余既濬
治市河因開水門導之入江遂作放魚二絕

局促濠池幾歲魚想應日日念江湖如今放汝非無意
亦欲天公放老夫

我今縱汝入江中好趁風雷早化龍只恐爲龍行雨苦
碧波深處且從容

贈方山人二首

日者俱云我未歸
獨君算我有歸期
仍言不出三秋裏
東望家山喜可知

故山久已辦菟裘
得去欣聞止在秋
涉世安能長戚戚
收心只欲罷休休

再用示方山人韻二首

暮年不是苦思歸
已約湖山恐失期
此意有誰能會得
祇應猿鶴是相知

不羨千金狐腋裘只知飽暖度春秋如今萬事皆踰分
此外何求更不休

送朱彥先歸鄉

西風一夜掃殘枝處處寒砧搥客衣我正思歸歸未得
却于江上送君歸

客有善畫者取予所和歸去來辭圖之成軸仍
爲老者寫照於其間感而有作

勞苦形骸不自知朝來始向畫圖披可憐憔悴今如許

更不歸休待幾時

到儀真沙河阻風三首

快意由來未易逢
順流却值打頭風
篙師知是江神怒
引棹重回小浦中

求退那知却冒遷
天心人意古難全
今朝行役還堪笑
下水船爲上水船

連日狂風已作難
今朝濁浪更如山
江神堅我歸田志
故示危機一水間

會賈守邀許倅有感

當年婺女三人別今日姑溪一席同
老去光陰能有幾相逢莫放酒杯空

宿霧濃雲撥不開更傾驟雨下天來
天公也喜人歡聚故遣斜陽送一盃

贈余居士二首

君知我意欲休官却道如今未得閒
萬事無求惟一退天公于此不應慳

我老祇思還舊隱君今更爲卜新阡餘生得此夫何欠
所欠歸來一溘然

余壬戌春校試進士同事者五十五人至戊子
歲因閱小錄所存者止四人感而有作二首

校試羣才一日中當時五十五人同二十七年零落盡
只存我與二三公

只存我與二三公可歎人生瞬息中縱使老來身未死
知能幾度見春風

久擬重陽一登龍山以荒榛峭壁無容足之地
欲訪昔人風帽遺址竟不可得遂領客之凌歊
偶成四絕

登高自古說龍山擬訪遺蹤去路難賴有凌歊臺尚在
不妨懷古凭欄干

當年宋武築凌歊人去臺空氣尚豪欲弔興亡無處問
且憑茱菊薦芳醪

下車日日欲登臺直到重陽始一來好對江山拚酩酊

此懷能得幾時開

宦情一似秋容薄
歸興渾如酒味濃
臺上望鄉何處是
夕陽影裏暮山重

伯洪以鐵拄杖見寄二絕謝之

應念衰翁老且疲
年來跬步要扶持
鐵為拄杖勞相寄
全勝花前只杖藜

鐵杖君家收幾年
更原古意賦成篇
寄來豈為資扶策
應見予心老益堅

和任路分喜雨

一雨驩聲已沸傳更觀佳句倍欣然一時果遂為霖望
會見重書大有年

喜雨三首

鑠石流金苦異常行人誰不困秋陽狂風忽送排簷雨
滌盡炎威作晚涼

昨朝偶得碧琳腴不敢濡唇畏暑涂雨過涼生襟袂爽
不妨傾倒且踟躕

畏暑停驂憇驛亭不知郭外雨如傾晚行但覺通衢濕
涼入郊墟分外清

喜雨

正憂麥槁井泉乾一雨中宵忽沛然莫恨梅花憔悴去
且欣新綠盡歸田

雨後

破雨衝風萬騎趨人人輕捷過飛鳧要須直擣天山去
趣取河水塞槁枯

喜晴

始喜晴天照眼明
忽驚風雨報秋聲
天公也念悲秋客
還掃羣陰作晚晴

晚晴三首

洗盡妖氛喜乍晴
風生萬馬四蹄輕
天時人事俱相契
敢有纖兒更弄兵

時巡中外已歡呼
那值天晴喜浴鳧
路上捷音良可慶
王師所至若摧枯

三分春色二分過那更連宵風雨多試向園中問消息
不知還尚有花麼

和許守遊春

玉蘂瓊葩壓眾芳一時縱賞擁如墻花邊笑索銀瓶酒
知是誰家白面郎

結客行行入翠微桃源深處醉芳菲狂歌不減劉公幹
盡日花間坐不歸

尊前莫惜千金費醉裏能令萬事輕須信人生行樂耳

此身何用絆浮名

括蒼胡經仲以經術授吾鄉子弟僕頃過錢塘
得吾兄永言多益及友人孟世功書未嘗不以
得交經仲爲言且以其往還詩什相示已決知
經仲非塵埃中人矣春初歸自錢塘遂獲識經
仲於齋館信數公之知人交道之不朽一年之
間凡三相會從容談笑者蓋十許日而詩筒之
循環來往曾未嘗輟而僕之心猶以不得朝夕

見經仲爲恨也一日經仲來訪席未定乃謂僕
曰吾將歸鄉明年不復來此矣僕念經仲之賢
交遊中所未有顧世方擾攘會合無期臨風語
離殆不勝依黯因誦老杜人生足別離之句作
五絕以送之

風期久已暗相親尊酒論文未厭頻底事天公苦乖隔
動將離索付騷人

明日離尊難重傾且停征馭話交情知心自古不易得

况是途窮賴友生

君詩字字凌珠玉入手卷舒看不足
別後襟期儻未忘
會寄筠筒入空谷

窮冬萬木凍欲折獨有松篁抱高節
貧交無可效慇懃
持此與君聊贈別

吾儕生長太平時不謂年來逢亂離
此別要煩君自重
相期重築太平基

二十七日泛舟偶成

小舟游漾小池中偶與吾人笑語同好把釣竿煙雨裏
一蓑放我作漁翁

登舟

天憐行客困陽秋許捨車徒上小舟十里好風祛滯思
一溪寒水助清遊

去郡登舟偶成一絕

脫得身來上短篷飄然初試一帆風孤城回首知何處
祇有凌歊在眼中

四月二十一日同妻孥泛舟登呂氏濟川亭二

首

不到茲山二十秋重來山水更清幽無因得向巖前住
日日持竿上釣舟

呂公清德著吾鄉生愛茲山死便藏顧我來遊雖恨晚
尚思杖屨共徜徉

渡錢塘江

萬頃煙波一葉輕風來枕上覺涼生我行觸熱渾無奈

却喜身心得頓清

寄龔帥

今朝駛步忽來前
報道除書下日邊
聞寄復歸賢使者
百城聞命想欣然

雖喜英賢帥十連
却慚糠粃濫居前
自知未免人揚簸
願使衰翁晚節全

行李看看近故廬
夢魂猶自遶洪都
帥垣暇日登臨處
把酒還能話我無

歸自郡中道上口占

禾黍離離歷道旁
蹇驢歸去晚風涼
揚鞭西指吾廬近
想見新醅已可嘗

六月二十一日早行十六首

四更山月吐微明
起促籃輿趁早行
忽聽疾雷催雨急
風生襟袖不勝清

稻苗初穗出紛紛
半是青雲半白雲
坐看黃雲呈上瑞
田家無處不忻忻

病軀終日困驕陽正慮行行去路長多謝天公憐此意
時飛疎雨作清涼

爲憶湖山且暫歸此心不是要追時君恩留我非由已
寄語山靈莫勒移

欲掛衣冠已上章更令衝冒去南昌南昌縱有佳山水
爭似安閒在故鄉

雨後西山氣象新野田高下水津津晚來弛檐臨風坐
聒耳蛙聲更可人

古寺經行知幾回
山僧又見我重來
暮年欲作終焉計
不得歸休只自哀

籃輿亟欲到柴門
終日驅馳亦苦辛
野外莫嫌車騎少
笙歌兩部自隨人

蟬噪園林處處同
此蟬鳴處顫春風
祇應寒餓全無力
吟不成聲喙已窮

東望吾廬百里間
二年別去一朝還
雖然未遂歸休意
且對湖山一解顏

出入鄉關四十暮勞人迎送每慚之今朝單騎歸來速
且喜鄉人都不知

不見湖山兩閱冬相思千里夢魂通今宵燭下怱怱看
猶恐歸來似夢中

竹間幽徑喜相通花下清陰苦未濃說與園丁勤灌溉
我歸要此養疎慵

漫來水上結危亭更凭欄干聽水聲洗得肺肝清似水
莫言亭下水無情

只愛湖光似鏡平
那知洶涌作潮鳴
直疑身在江舡上
夜半更聞風雨聲

暫歸祇欲見湖山
多謝親朋日往還
但愧年衰筋力憊
將迎容我片時間

久欲乞歸未得一日
蒙恩放歸不勝欣喜
塗中
得十五首

今日方行第一程
看來已覺此身輕
若還歸到湖山裏
何啻乘雲上玉清

我病只宜投綬去君恩却許奉祠歸小人報國非無志
正恐叨逾觸禍機

東去忽忽不暫停我於此地豈無情祇緣衰病歸心切
不憚崎嶇趨曉程

來時似覺秋猶熱去日忽驚秋已深一去一來何所益
不如歸去舊園林

老夫非是厭洪都正恐沉迷失故吾縱使東湖花似錦
不如歸對小西湖

邦人送我說殷勤自愧初無德及民若更躊躇不歸去
猿驚鶴怨亦愁人

去年來見荷初敗今歲歸逢菊已殘殘菊敗荷渾似我
縱餘芬馥豈堪觀

記得年時入境來老分閭寄懼非才今朝遂出洪都去
笑指故山真快哉

夾道喬松幾度春青青黛色四時新當時若盡荒郊種
萬頃清陰更可人

欲寒還暖雨還晴極目秋郊景色明應是此歸天亦喜
故將風日作人情

無日無時不念歸此心宜有鬼神知如今已作終焉計
寄語山靈莫勒移

荒墟忽見翠成堆錯認青山入眼來元是松林如此好
不妨歸去更勤栽

路傍遙見一山居歡喜猶如見故廬見似故廬猶自喜
如今到後喜何如

兀兀籃輿足欲拳聊扶藜杖步山邊招提此去無多地
且就僧房借榻眠

淡煙斜日媚郊原中有人家似輞川地側忽驚車馬過
三三兩兩竹籬邊

九月二十六日同朝宗澤民遊洞宮用劉使君
韻二首

雲藏仙窟幾何年一旦來遊豈偶然造物應憐林下客
故令一覩洞中天

愛遊此地已多年今日身心始豁然洞裏真人雖羽化
蒼蒼喬木自參天

如老堂

少年有志覓封侯老去知非萬事休薄有田園能自適
不妨賣劍買黃牛

一堂風月一床書隨分琴樽樂有餘試問乘軒遮道客
何如歸去狎樵漁

種德堂

我本農家世賤貧一門相繼亦簪紳當知來處非今日
莫學詩人只爲身

觀十二弟種德堂詩和其韻

萬事忘懷付酒尊長閒不厭客登門但存心地平如砥
勝買黃牛教子孫

竹塢

此君生長此山中直節從來自不同今日高標還卓出
萬人誰不仰清風

雲龕

君將富貴等浮雲却許白雲來就宿靜處何妨共一龕
免教隨手翻還復

入界

日炙風吹人倦乏山重水複路縈迴一番行病思休息
且喜今朝入界來

送津還任

汝到庭闌話未終若爲行色又匆匆要知只有歸來好

便做三公亦是空

三七姪入新屋

華屋新成集賀賓門闌盛事一番新願言積德高於屋
屋下長存百歲人

我昔行年近六旬辛勤纔有屋容身汝成廣廈年方壯
端是吾家有福人

送姪赴廷試

我是田家本業農偶然兩世到蟾宮書生天幸有如此

豈復更憂吾道窮

一第男兒未足誇
喜傳衣鉢振吾家
大廷好上千言對
要使聲名播邇遐

上林躍馬看騰驤
父老猶言昔日張
顧我兒曹殊未學

敢將蹤跡繼前芳

邦人言昔張侍讀之子寺丞登科東坡曾寄詩以相慶詩中有洗眼上林

看之句

和康伯可重陽

過了重陽又一陽
梅開亦擬共壺觴
病中無復成狂飲

且作前賢醒裏狂

掃墳東山感舊示十五姪

四十年前此讀書與君俱欲上亨衢
君雖未達心猶壯我已衰頽作老夫

梅花下聞角聲

兀坐江城厭寂寥
喜逢春色上梅梢
寄言畫角休吹遍
留與鈴齋作淡交

睡中聞鶯

解鞍蕭寺憇清幽
睡裏忽聞黃栗留
驚破夢魂何可恨
得知身在浙江頭

敗屋有感

甲第巍然數百間
一朝人去頓摧殘
寄言行客休興歎
但積陰功後代看

悼王習之

兩州佳政萬人傳
一旦那知遂溘然
到底久生從古少
要須乘健早歸田

嘲欽師

師與予心總愛山從來已許伴予閒若爲一出俄經月
却戀塵凡未肯還

贈遠老

一瓶一鉢自由身聊向江南翫水雲踏徧千山并萬壑
却歸林下炷爐薰

送安老

師走叢林不計年若爲猶未了因緣萬年有路何妨去

透取無生不二禪

和遠老韻二首

平生痼疾在煙霞到處林泉是我家若也遠公容入社
直須酤酒不須茶

欲訪天台帛道猷夢魂先到石橋頭箇中直待桃花放
始得從師爛漫遊

送明老遊鴈蕩五首

昔年曾作鴈山遊倒指今踰四十秋嘆我豈勞蝴蝶夢

美師重到大龍湫

師到龍湫謁矩羅爲言別久渴心多當年見處祥光滿
試問今還記得麼

吾兒此地偶鍾英紹我家風尚典刑所幸吾師知此意
殷勤爲我謝山靈

方欣林下共談禪底事深公挽出山千里同風無道俗
何妨一笑便言還

遍參尊宿走諸方老去纔能返故鄉漲水飛雲前輩語

他鄉莫更久徜徉

和遠老四首

事好休時便好休不應人盡覓封侯歸來已快平生志

況有高人來聚頭

身居仕路夢家山一日君恩放我還從此便爲終老計
祇愁造物靳清閒

世人老去不知休祇羨三公與五侯爭似山僧都不會
困來衲被便蒙頭

相逢正好共看山底事
怱怱便欲還今日乍晴山更好
可能伴我片時間

上七齋素不飲

人日晴天萬里開
自應一笑上春臺
清齋偶阻花前醉
且把茶甌當酒盃

送津赴紹興倅八首

讀書已負少年時
老大空踈愧我知
汝肯爲余償此志
雖窮亦是起家兒

山色湖光足自怡幽棲無一不相宜只嫌野外遊從少
汝早歸來共樂之

汝辭秦邸佐名藩端爲親庭數舍間數舍相望雖不遠

爭如在側日承顏

當年我鎮卧龍山曾種千花與萬竿歲久不知無恙否
因來且爲報平安

我曾開鑿鑑湖田功竟難成愧昔賢汝謁馬祠須問訊
此湖興復是何年

出仕曾塵侍從班
退休還得老湖山
已慚過分無他望
只願吾兒相對閒

我辭官路已多時
魂夢今猶畏險巇
汝既飽諳游宦味
會須早作箇歸期

人生萬事不如歸
只恐歸來不及時
汝若能爲陶靖節
我身勝到鳳凰池

山居上元

未能免俗強隨緣
聊掛燈毬記上元
席上雖無羅綺繞

遊人來往亦喧喧

十六夜見月

連宵待月屢登城特地遮藏不肯明過了佳辰方皎潔
嫦娥何事太無情

代答

人生何用苦多憂無日無時可宴遊但使此心忘係累
涼天佳月即中秋

甲子日無雨偶成

連歲人懷水潦憂年登猶歎不全收
夏逢甲子天無雨
預喜今年又有秋

和許守松陰

喬松轉日影斜斜穿入疎櫺細作花
怪得清陰長不改
原來松下蟄龜蛇

題心遠軒二首

山居我欲避囂塵尚覺門庭俗客頻
羨爾結茅當道左
一軒風月作閒人

扁榜當年我命名喜君心與迹雙清眼前風物渾如舊
但覺庭前春草生

和劉與權韻三首

平生嗜好唯愛山前身疑是山中相歸來深處得幽棲
柴門正與山相向

去年君過我山中尊酒相歡十日同別後相思腸欲斷
暮雲空復指江東

異縣相望兩驛間何時復此共看山向來同社今無幾

莫惜籃輿數往還

陳子厚送韶鴨將以七絕因次其韻

久聞韶鴨有靈蹤
首尾俱輕快御風
公獨惠然持見贈
應知野性與余同

興在江湖萬里間
洿池一曲豈能安
今朝來我西湖上
眼底陡驚天地寬

湖光深處恣沉浮
未讓波間鷺與鷗
舊侶此時應羨汝
欲來相就苦無由

朝朝兩兩下平沙
添得湖中景趣嘉
碧卵從今生育去
便堪裝點作漁家

投迹山林不厭深
老來寧復計升沉
水禽得得來相伴
應識幽人一片心

初來便自與人宜
相近相親自在飛
底事悠然無畏忌
也知老子久忘機

雖是微禽亦美觀
豈無繒弋欲相干
不須更起高飛念
且向湖中戢羽翰

題珪師松雲庵

一瓶一鉢一枝筇
皓首歸來萬事慵
應笑白雲猶世態
却來庵外媚孤松

附錄文二首

代廬州守進秩謝表

帝綸中下天澤外同
加瑣闥之清聯
守肥陵之舊壤
承恩優厚無已
戰兢中謝伏念
臣才能無它仕
宦素拙久塵污
於侍從無補益
於絲毫復此拜
嘉惶焉增愧念
恩

非所宜當則皆為無功之食惟命出而不反則又將無
說以辭此蓋伏遇皇帝陛下龍德興潛離明照隱上眷
以承天心之重下安以慰物望之深顧雖無庸例亦有
命簿書斷斷未瞻天日之姿恩渥洋洋恭被雷霆之澤
祿隨寵至榮與愧兼惟懷忠赤之一心以謝生成之大
德臣無任

姑溪集序

李公端叔以詞翰著名元祐間余始得其尺牘頗愛其

言思清婉有晉宋人風味恨未覩他製也乾道丁亥假
守當塗因訪古來文士居此邦而卓然有聲于世者惟
李太白郭功父與端叔三人郡舊有太白功父集而端
叔獨缺然求于其家而子孫往往散落無復遺藁間得
之邦人類而聚之命郡士戴翬訂正釐爲五十卷鋟板
於學昔二蘇於文章少許可尤稱重端叔殆與黃魯直
晁無咎張文潛秦少游輩頡頏於時今觀其文信可知
已或謂端叔晚節銳於進取有所附麗雖若可疑然范

忠宣公遺奏極於鯁切詆斥不顧一時用事者欲寘忠
宣之子於理端叔慨然自列謂實出其手既而公所爲
忠宣行狀復出由是得臯南遷廢錮終身曾不少悔其
勇於義若此詎可以微瑕掩之哉余固愛其文又表其
行誼之可嘉者并以詔於後云端叔名之儀其先景城
人既謫而南始居姑溪自號姑溪居士今以名其集天
台吳芾序